

印順導師 著

成佛之道

偈頌

新學
PDF

成 佛 之 道
偈 頌



助印者

香港印順導師基金會

美國佛教會圖書組

公元二〇〇四年

佛歷二五四八年

敬印 伍仟部

慶祝

『印順導師百歲高壽』

◎ 廣結法緣 ◎

成佛之道

偈頌

第一 歸敬三寶章

有海無邊際，世間多憂苦，流轉起還沒，何處是依怙？
積聚皆銷散，崇高必墮落，合會要當離，有生無不死，
國家治還亂，器界成復毀；世間諸可樂，無事可依怙。

鬼神好凶殺，欲天耽諸欲，獨梵依慢住，亦非歸依處。
歸依處處求，求之徧十方，究竟歸依處，三寶最吉祥！
正法以爲身，淨慧以爲命，智月朗秋空，禮佛兩足尊。
三世佛無量，十方佛亦爾。悲願來濁世，禮佛釋迦文。
智圓悲無極，斷障無餘習，三德等究竟，方便示差別。
丘井空聚落，朽故寂無人，彼岸林泉樂，禮法離欲尊。
正法妙難思，善淨常安樂，依古仙人道，能入於涅槃。

依法以攝僧，和樂淨爲本，事和或理和，禮僧眾中尊。
敬僧莫呵僧，亦莫衡量僧，隨佛修行者，住持正法城。
三寶真實德，無漏性清淨。化世真亦俗，佛法得長存。
自誓盡形壽，歸依佛法僧，至心修供養，時念諸勝利。
此歸依最尊，此歸依最勝，不由餘歸依，得樂得安隱。
所說歸依者，信願以爲體；歸彼及向彼，依彼得救濟。
若人自歸命，自力自依止，是人則能契，歸依真實義。

第二 聞法趣入章

由聞知諸法，由聞遮眾惡，由聞斷無義，由聞得涅槃。
如器受於水，如地植於種，應離三種失，諦聽善思念。
病想醫藥想，殷重療治想，隨聞如說行，佛說法如鏡。
趣入正法者，應親近善士，證教達實性，悲愍巧爲說。
觀德莫觀失，隨順莫違逆。佛說滿梵行，學者應尊敬。

離彼三途苦，不生長壽夭，佛世生中國，根具離邪見。
生死流轉中，人身最難得。憶梵行勤勇，三事勝諸天。
難得今已得，精勤修法行，莫使入寶山，垂手歎空歸。
聞法而發心，隨機成差別。下求增上生，現樂後亦樂。
中發出離心，涅槃解脫樂。最上菩提心，悲智究竟樂。
依下能起上，依上能攝下；隨機五三異，歸極唯一大。
不滯於中下，亦不棄中下，圓攝向佛乘，不謗於正法。

第三 五乘共法章

正信歸依者，應修於正見，及修於正命，勝進不爲難。
所說正見者，人生之正觀。心淨或不淨，利他或損他；
善行不善行，佛子應諦察。有報必由業，微小轉廣大，
能引或能滿，決定或不定，現生或後報，諸業不失壞。
隨業報善惡，五趣常流轉，隨重或隨習，或復隨憶念，

由業往後有，薪盡火相傳。生死常相續，聖者得解脫，
愚智縛脫異，深信勿疑惑。流轉五趣中，身心多苦迫。
大地獄極熱，近邊徧遊歷，八寒及孤獨，是諸苦中極。
旁生種種異，吞噉驅使苦。餓鬼常饑渴，不淨以爲食。
悉由三不善，惡行之所感。人中苦樂雜，升沉之樞紐；
人本誤鬼本，習俗謬相沿。天趣初欲界，色及無色界。
身勝壽亦勝，樂勝定亦勝。諸苦由惡業，樂由善業集。

苦樂隨業盡，修善宜積極。若時能行善，而未作善業，一旦苦果臨，爾時復何爲？求人而得人，修天不生天。勤修三福行，願生佛陀前。依資具得樂，依施得資具；故佛爲眾生，先讚布施福。施以捨以利，由悲由敬別，心田事不同，功德分勝劣。施應如法施，勿隨至怖報，求報及習先，希天要名等。克己以利他，堅忍持淨戒。以己度他情，莫殺莫行杖，勿盜勿邪淫，勿作虛誑語，

飲酒敗眾德，佛子應受持。五戒盡形壽，眾福之所歸。
加行日夜戒，隨順出離者。不殺盜邪淫，不妄語兩舌，
不惡口綺語，離貪瞋邪見。諸善之根本，佛說十善業，
人天善所依，三乘聖法立。欲樂不可著，散亂多眾苦，
依慈住淨戒，修定最爲樂。調攝於三事，心一境名定。
漸離於分別，苦樂次第盡。四禪四空處，慈等四無量，
佛說諸定法，次第而修習。布施多雜染，禪定向獨善，

依人向佛道，戒行爲宗要。心性怯畏者，佛說應修念。
繫念佛法僧，戒施天功德。如入光明聚，陰暗一時失。
正念彌勒尊，求生彼淨土，法門最希有，近易普及故。
見佛時聞法，何憂於退墮？

第四 三乘共法章

一切行無常，說諸受皆苦；緣此生厭離，向於解脫道。
隨機立三乘，正化於聲聞。解脫道遠離，苦樂之二邊；
順攝樂行者，在家修法行；順攝苦行者，出家作沙門。
此或樂獨住；或樂人間住。或是隨信行；或是隨法行。
雖復種種性，同修出離行。佛說解脫道，四諦與緣起，

甚深諸佛法，由是而顯示。苦集與滅道，是謂四聖諦。
苦者求不得，怨會愛別離，生老與病死，總由五蘊聚。
所謂五蘊者，色受想行識，取識處處住，染著不能離。
此復由六處，取境而生識。或六界和合，世間苦唯爾。
苦生由業集，業集復由惑，發業與潤生，緣會感苦果。
業有身語意，善惡及不動。業滅如種習，百千劫不失。
隨業感生死，不出於三界。煩惱貪瞋癡，不善之根本。

癡如醉如迷，瞋重貪過深。佛攝諸煩惱，見愛慢無明。
我我所攝故，死生永相續。苦集相鉤纏，死生從緣起，
佛說十二支，如城如果樹。無明之所覆，愛結之所繫，
有識身相續，相續而不已。緣識有名色，從是有六處，
根境相涉觸，從觸生於受，緣受起於愛，愛增則名取，
因是集後有，生老死相隨。滅應滅於惑，惑滅則苦滅，
解脫於癡愛，現證寂滅樂。能滅苦集者，唯有一乘道。

三學八正道，能入於涅槃。初增上尸羅，心地淨增上，
護心令不犯，別別得解脫。在家五八戒，如前之所說。
出家戒類五：沙彌沙彌尼，比丘比丘尼，及式叉摩那。
於中具足戒，戒法之最勝，殷重所受得，護持莫失壞。
極重戒有四：殺人不與取，淫行大妄語，破失沙門性。
餘戒輕或重，犯者勿覆藏，出罪還清淨，不悔得安樂。
能持於淨戒，三業咸清淨。密護於根門，飲食知節量，

勤修寤瑜伽，依正知而住。知足心遠離，順於解脫乘。
此能淨尸羅，亦是定方便。進修於定學，離五欲五蓋。
不淨及持息，是名二甘露。依此而攝心，攝心得正定。
能發真慧者，佛說有七依。增上慧學者，即出世正見。
佛爲阿難說：緣起義甚深：此有故彼有，此生故彼生；
無常空無我，惟世俗假有。此無故彼無，此滅故彼滅；
緣起空寂性，義倍復甚深。此是佛所說，緣起中道義，